

отступив не будет ти на соблазн. По сему убо подобает нам любовь держати ко всякому не лицем, но сердцем и ото всех сих дел удалятися, от них же растерзается любовь. Но от них же крепится любовь, побеждает же ся вражда и лжа, сих убо держатися, еже есть воздержание, кротость, не жадание имениа, пост, худость ризная, милостини от своего труда. Аще бо начнеши имети воздержание, не похощеши ни у кого же ничесоже насильством отъяти, ни инем чим обидети, ни мзды в суде взяти, ни преж суда, еже мня дружбы ради, ни в купли чрез естество много цены хотети приимати, ни в лихву сребра своего дати, ни украсти, ни гордыни имети,

л. 190 ни тщеславитися, ни завидети, || ни лгати, ни ротитися, ни гневатися, ни мстити, ни пустошных словес глаголати, ни в церкви глаголати, ни к волхвом и чародеем ходити, ни многоглаголати, ни высоты искати, ни красоты риз, ни много богатства. Аще же начнеши имети кротость, никого же бьеши, ни грабиши, ни поносиши, ни инем ничим же оскорбиши. Аще же начнеши имети нежадание имениа, то ни от кого же стяжання трудов его ничим же преобидиши, но вся от своего труда стяжати начнеши, еще же и от сего милостинию подаси. Аще же начнеши имети пост, утончают ти вся мысли, не токмо бо к человеку любовь покажеши, еже ти не требе снеди ради восхитати чужая труды, но и скотом, и зверем, и птицам, и рыбам, всякому живот имущу любовь твоя явится: и сия бо вся богом сотворенна животна, из них же кровь изливается, в постех же и сие твоя ради снеди да не умертвится и кровь не изливается. Ибо бог

л. 190 об. дав от сих на снедное утешение человеком да быша || заповеди его исправили. Аще кто не исправит заповеди его, не достоин сему имети обычая дерзновенна, дабы его ради снеди божия творения животная убивати, но за согрешение достоин прияти ему смирение и самому себе к сим животным тварем прилагати и хужеши сих мнети, понеже сии не преступиша творца своего заповеди, ты же пред ним же согреши, того же сотворение животное хощеши невозбранно снеди своя ради умершвляти. Разумеи сие, аще бо и в человецех кто ти есть друг и повелел ти еси от своего дому всяки вещи невозбранно взимати, егда же ключиттися с ним пря, к тому уже не можеши не смирився с ним ничто же от дому его прияти, кольми же паче бога прогневав и не умолив, хощеши творение его животная своя ради пищи умершвляти. И еще же ти рку, яко аще приидеши ко другу своему, сии же представит пред ти ядь многоценну и

л. 191 глаголет ти снести || ты же речеши, яко не удостоит начати сея, многоценна бо есть, последи же рчешися от друга своего, яко благоразсуден паче же сего за воздержание животных снедей похвалим будешь от бога, яко да о тебе сие слово рчется: блажен милуяи душа скот своих. Сим же никакже не глаголи, яко господь егда бе на земли во плоти и тогда от сих животных брашен ядыше, тако же и апостоли. Сий есть извет поли вины. Господь бо весть, како или в чем сиа сотвори, всех бо творец, может бо аще восхошет и животное земноплодным претворити или земноплодное животным. Притча бо сему уверительна, оживленный Авраамов закланный телец и заматеревшая Саррина и Аннина и Елисаветина ложесна. И еже глаголют, пол рыбы снедена, другую же страну и ныне в живых видим. Господь бо' прииде исполнити закона и явися по всему, яко не по привидению человек есть, снесет же своя творения; и не требе бо ему пост, яко не сотвори греха аще бо и постися 40 дний, но за Адамово согрешение. Сим убо никто же о сем разсужай, Христос бо сам и судиа и творец всему, и вся весть, како что сотвори. Егда бо ркоша ему